

四庫全書

集部

欽定四庫全書

集部

竹軒雜著卷二

詳校官編修臣范來宗

主事臣呂雲棟覆勘

謄錄監生臣吳殿英

欽定四庫全書

集部四

提要

竹軒雜著六卷

別集類三 宋

臣等謹案竹軒雜著六卷宋林季仲撰季仲字懿成永嘉人登進士第歷官太常少卿知婺州自號蘆山老人嘗僑居暨陽集中又自稱濟南林某者蓋其祖貫也宋史不為立傳其行事不少槩見惟陳振孫書錄解題稱季

仲以趙鼎薦入朝奏疏沮和議得罪仲熊叔豹季狸其弟也皆知名云云今案集中與趙僕射書有相公過聽引而置諸朝鹿鹿三年蔑有報稱之語與趙鼎薦引之說合惟沮和議一疏已不見于集中其得罪貶謫之事遂畧而弗顯集中又有祭德和弟察院弟諸文據所云同祖所出兄弟八人者知其弟兄甚多而仲熊叔豹之名亦已不可復考然宋史

趙鼎傳稱鼎之再相嘗奏言今清議所與如
劉大本胡寅呂本中常同林季仲之流陛下
能用之乎是季仲在紹興中實負清流重望
故集中劄子雖所存無幾而多力持正論深
切時弊之言其趙鼎南遷以後所與簡牘數
篇無不反覆慰藉詞意諱摯交道之篤尤可
槩見又庚溪詩話稱季仲頗喜為詩語佳而
意深今觀所作雖邊幅稍狹已逗江湖一派

而筆力挺拔其清雋亦可喜也集本十五卷

世久失傳論宋代人物者或不能知其姓氏

今從永樂大典中搜輯編綴釐為詩一卷文

四卷用存其槩且為畧攷本末附著于此俾

不至無聞于後焉乾隆四十六年九月恭校

上

總纂官臣紀昀臣陸錫熊臣孫士毅

總校官臣陸費墀

欽定四庫全書

竹軒集著卷一

宋 林季仲 撰

四言古詩

有客

并序

有客思英伯也英伯山居歲莫雪零故作是

詩以貽之

有客有客託于空谷問何以樂樂彼幽獨矯矯其松籜
籜其竹微風過之冷然成曲歲曰莫止霰雪交揮誰與

晤語懷我人斯我之懷矣褰裳從之泥淖伊阻中心悵
而豈無他人以翶以翔意氣所親不能弭忘遙遺緒
久矣弗數之子之秀吾宗之光我有薄酒子試歎兮雪
霽江明共此月分企焉新詩到蟄窟兮老子鬍鬚正愁
絕兮

五言古詩

觀徐孺子畫像

伯淮卧彭城遙屋生蓬茨天子呼不起思見巖壑姿俾

工圖其形銜命日夜馳落筆竟不得輞面以疾辭豫章
有孺子同時隱江渭栖栖非我事結廬對風漪時人亦
罕識阿堵誰寫之我聞郭有道曾遣輕騎追疑此言語
生即是茅畫師

送真歇禪師

我與真歇師同年五十八對之意頽然百事付華髮買
舟繫籬傍一日來告別挽之不肯留徑山演法切佛法
果何如請師為指訣俛首無一言苦欲相泯滅余漫述

所聞此法本無缺山河連大地鳥獸暨魚鼈微至一蟻
蠛中舍大千闊試即此身求萬象皆森列聲色臭味等
六根能剖決阿誰使之然未可計巧拙盍亦反故鄉子
細自披抉當有無價珍終身用不徹胡為浪馳走千里
訪名刹環立廣座下觀人搖輔頰譬如坐海底巨浸從
頭沒反問岸上人覓水濟我渴師聞抵掌笑却道我饒
舌徑山堂未開居士法先說儒生玩韋編貝葉師所閱
兩家相詬病久矣互侵伐孰如吾二人一見意軒豁縱

談這箇事迥出言詞末古人知造車不較出門轍看誰
到長安寧論吳與粵因書問答語聊以贈真歇去去亦
何之千水涵一月

秋熱次高仲貽韻

乘時火初流孰熱病未脫踏冰思少蘓坐覩哀苟活雲
意斷渰渰雨聲閟渺渺安用天官為不悟秋序奪巫尪
暴何辜夸父僵且渴熯山將焚燒翻海欲灑潑蛟龍遁
寂寞蠅蚋恣喧聒瘴蒿時墮水涸魚暫濡沫斯焉未不

登往矣穗奚掇衆心禱不昧羣望走莫遏殷勤聞雷行
閃閃驚電抹嘉樹凝盆翻脫葉邇帝持汲井憶羸餅承
雷爭羅鉢新涼來不斷濁水去如割未論汾氣銷陡覺
煩襟豁遂回望電眼免蹙憂稼頰一飽茲可營百慮何
勞剏明公軫慈仁此道歸包括世事有反覆愁腸屢迴
幹栖栖同里毗閔閔憂旱魃賦詩輸悃悰盈軸辨嗟咄
句圓珠走盤意定弦在筈千仞徒仰高一葦敢杭闊韜
疵知含洪策蹇終覶危

坐我覩金中逾月不得脫勞生亦何聊喘喘覓少活駕
言往空谷卧聽驚瀨瀨遭逢龍礮子此事又中奪天公
不我憐定為化鄧渴一夜翻河漢散作珠璣潑簷垂素
練直栱枕鳴聒聒更饒牕戶間蕭瑟灑飛沫老火謝餘
暉削跡去如撥乃知造化心潛通本無遏繁暑移清涼
變化在一抹田父有喜言儂得壘穗持却憶灌漑時揔
揔抱甕鉢王者仁如天寸物惡傷割獨愛夏日長器度
何不豁向隅泣一夫滿堂蹙其額餘涼止殿閣蕪垢直

可剗我願均此施遠邇歸囊括措意膚寸間六合可旋
幹寧容凶逆儔肆虐為旱魃掣電備麾旛鞭雷供叱咄
號令挾風行聲颶齊萬苦煙塵悉蕩攘再見天地闊孰
與長畏人朝夕懷艱危

癡暑如癡人吝權不肯脫涼風戒七月尚貪朝夕活雲
雷動地來一夜雨聲澑老火無晶光奔迸氣褫奪我思
疏仲翁千載猶飢渴父子腰金黃照眼光滋滋車馬趨
其門市井等謹賜從容相與言身名如聚沫功成不還

鄉患至將誰掇相隨出關去浩然不可遏挽飲東都門
頽顏酒微抹迎迓走兒童爭取霜髯捋歌呼接日夜彈
筑雜擊鉢時時間餘金趣賣供醜割落落丈人行器度
自軒豁子孫汝何知徒蹙求田頽邇來官途險憑誰為
鍊剗冥行胥荆棘進退俱有括胡不觀四時寒暑遞推
幹強聒不知幾斤逐齊旱魃得失何恠事書空漫咄咄
要須慎其初毋輕弦去筈我本一散翁涉世多迂闊何
如二大夫安枕無艱危

七言古詩

謝李端明惠李翰林集

江漢滔滔去不回
幾人留得詩名來
要須洗以千斛水
莫令胷臆生纖埃
清狂我愛李太白
亂之鷗鷺誰嫌猜
一生事業在杯酒
富貴於我何有哉
長安市上喚不醒
醉眼徐爲君王開
揮毫散霧金鑾殿
氣使權倖如奴僕
風騷獨步千載上
鞭撻楊馬哈鄒枚
長流夜郎得不死
定知造物須憐才
文采至今獨未泯
耳孫氣象何崔嵬

寤言世士少風骨慨然力欲扶衰頽刊傳家集流海內
廉頑立懦茲為媒分頌亦及蓬草士使者踏破墻前苔
神交不待讀終卷騎鯨恍惚來瑤臺氣酣日落酒不足
更挽天河注玉杯嗚呼俗隘直可哀吾非斯人誰與陪
朝遊蓬萊夕方丈去去相隨翔九垓

次韻酬黃季章

長安公子意氣豪笑我憔悴居蓬蒿人生棲託一枝足何
用搏風九萬高我今百事付流水歸卧北窓心獨喜

林表春禽自在啼絕勝豢養金籠裏誰能胷臆無塵垢
木鴈未論才不才子陵事業亦何有風月淒然一釣臺

天柱峯

尋勝權輿自天姥芒鞚踏遍春山雨要得山如磊落人
紛紛拳石何足數忽逢一柱挿天寒行茅最尊疑父祖
羣峯往往皆兒孫環列膝前仍俯伛我憂穹昊欲撐柱
莫笑杞人心獨苦伊誰有力能致之大庇蒼生使安堵

五言律詩

陪館中諸人遊天竺分得香字

不到八年久重來雙鬢蒼珠璣濺寒溜笙磬咽風篁啼
鳥千林晚飛花一路香吾宗故廬在立馬傍殘陽

中秋不見月

淹淹一夜雨脉脉萬方情勿恠雲多妬從來物惡盈水
渾珠自瑩垢盡鏡還明共賞此時月無論陰與晴

次韻陳明錫見寄

一別從京洛相逢向海邦倦遊憐舌在多病覺眉龐佳

處隨山屐餘生付酒缸
新詩眩老眼細讀傍寒窓
合去趁華闕難教滯陋邦
悲鳴憐老驥迎吠厄羣龐
便腹書千箇濡頭酒一缸
懷君夜不寐落葉打空窓
卑棲安故里薄宦倦他邦
依社願為櫟滌牲寧用龐利
名蛾赴燭身世蟻浮缸多謝江邊月
相尋到小窓

周希父見寄次韻

松菊荒三徑風塵走十年
家山憶到骨世路厭摩肩
懶計詩工拙寧分酒聖賢
從他消便腹老去只貪眠

次韻蕭德起見寄

漫求三金祿浪走十年塵白髮不饒我虛名能中人溪
山閒始見魚鳥靜相親共對一庭月誰非吾近鄰

陪趙守登樓賞紅梅

大潔時爭嫉獨醒人更疑漫隨春色媚不改歲寒姿霞
帶壽陽臉酒融姑射肌憑誰慰孤寂新有倚樓詩

錢塘別諸同年

晚色明沙際春愁挂柳邊相逢一尊酒難值七同年聚

散鴈導渚行藏魚在淵西興殘夜月獨照渡頭船

昨夜夢陪後乘次前韻

落峯迷曉徑零露點秋畦節物驚衰鬢登臨憶故棲蒼苔痕過履修竹濕新題昨夜寒窓夢相隨疊嶂西

感興

慶吊何時已勞生不自閒野情雖脫畧人事足機關附尾初無意同塵半強顏柴門當却掃未敢負雲山

和人對雪

匱薄一樽酒
樓遲雙鬢毛
隨風散簷雪
卷地作秋濤
漢使去不返
邊城寒更勞
誰當如李愬
乘間制雄豪

贈別陳給事

仕途多汨沒
歸袖獨飄颻
要伴赤松子
終辭青瑣郎
水雲寬處好
日月靜中長
萬事休回首
停橈即故鄉

陪樞密諸丈遊赤松迫於還城阻為寶峯之集

情見于詩

村迥雲連屋
溪晴水繞畦
半生嗟薄宦
隨處愜幽棲
散

策尋遺跡披塵識舊題夕陽催上馬不到寶峯西

中秋次韻

一葉下庭木初敲窓戶秋陰雲偏妬月衰病懶登樓勲
業頭先白江河淚未收停橈是吾土休夢野當遊

憩瑞安北湖詩三首

去去春無語融融物自驕餉耕憐野老隨犬過山橋晚
唱緣溪口晴暉絆柳腰迂儒欲何往只合伴漁樵

逕深松翠重風軟馬蹄騎水繞誰家屋門飛小竹橋龜

開平野兆峰引斷山腰生理吾能免趨林拾墮樵

吐晴林雨薄弄水夕陽驕風定雲橫野馬鳴人度橋
鮮斑封石骨花影動溪腰誰破南窓夢空山落斷樵

次韻婺州蕭教授見寄

不到雙溪久渾疑一夢間把君詩在手見我別來山薄
宦故不惡危塗難自間翩翩出林翼飛倦合知還

贈趙遂甫別

才擅金枝秀名標桂籍先有如此公子不負我同年風

落松間雪沙明竹外船天涯人老矣尊酒憶悽然

贈李舉之別

摛藻才何贍哦松志未酬奉祠得南嶽戲絲向丹丘賈

誼方年少馮唐已白頭桃花烟浪暖看子上瀛洲

舉之
明春

試詞學

晚眺二首

秋色澹修渚夕光明小樓溪虛烟漠漠天迥鴈悠悠短
髮存堪數黃花挿自羞青山本無事歛黛為誰憂

病與老相守慵思靜自便故園三徑菊歸路一蓑烟高
下雲連谷從橫水護田淒涼千古事簇簇夕簷前

項居士挽詞

孝友從初歲溫恭見隱居誰云不為政只此是知書末
俗惟多偽何人得似渠春江照丹旐恨亦到龜魚居士禁毅

常買鱗
介縱之

潘居士挽詞

君家多陰德自昔賦閒居不用毛錐子甘乘下澤車李

衡千樹橘范琰一園蔬夫婦仍同穴亂離誰似渠

袁居士挽詞

君看袁居士蒼然松柏姿生涯一樽酒事業五言詩去
跨月邊鶴空餘床下龜江村相送處尚憶杖過眉

挽林潛聖先生詞

省已知為政忘言是讀書世儒誰說此學子可憐渠文
物思前輩風烟翳故廬倚檻獨長嘆吾道竟何如

胡夫人挽詞

吳巨
鎮妻

自昔衣冠盛人言胡與吳詩書漸漬久婦女見聞殊鳳
去憐雛弱鸞吟嘆影孤靈龜表賢德卜地得慈湖

柳夫人挽詞

風俗日云薄典刑終未泯請看列女傳今有柳夫人色
養金章貴褒封鉢軸新淒涼板輿路却見小梅春

悼潘君秀才

投筆辭場屋攜錢送酒家身名俱夢幻醒醉是生涯沙
晚號寒鴈林高慘暮鴉嗟予方哭弟清淚墮悲笳

沈朝議挽詞

擢第繇元祐封侯迨紹興曠懷初不競薄俗漫多能勲
業一壺酒交遊八尺藤諸生話鄉老揮淚濕寒燈

趙寶學挽詞二首

珠海光無盡瑤山氣自溫鴻基開烈祖餘慶襲賢孫妙
墨潛虬動雄詞駭浪翻九重應震悼同姓失毛原

粲粲霜蕤晚淒淒烟渚秋長隨山簡馬同上謝公樓詩
句入飛鶩歌聲落釣舟那知倚欄處直北是松楸

九日集於

謝樓歲歲以為常公今不在而
佳城在望坐客皆為之愴然

程顯學挽詞二首

卓犖千人傑飛騰四十秋才應有餘刃事不見全牛持
節半諸道分符知幾州終遺搢紳恨不作富民侯

憶向沙頭別誰知地下遊祠堂只如舊庭竹自生秋回
首山埋玉傷心月滿樓慎江日夜去中有淚俱流

哭薛吏部

伯仲皆登第人言薛與林淒涼五年事摧折兩家心漫

醉春來酒誰全別後襟空餘釣磯在落日見孤岑

白鹿春城下黃牛古隴頭年年喚兄弟兩兩酌松楸今

日逢寒食哀君返故丘縈懷多少恨不逐晚雲收

兩家兄弟

相繼登第五年之閒淪落幾半又祖塋相鄰歲時展省往往同日今吏部之葬適在清明故云白鹿城黃牛塋其葬地也

周希父挽詞

憶昔同年友吾鄉有六人而今如夢寐強半委埃塵雲
護霜天晚梅倉野逕春

希父常賦此詩屬余和往復數篇

回頭賦詩處

清淚墮江濱

許厚之挽詞

跋馬西州路山川淚眼傍看君有遺範如我見橫塘寒
日低仄步浮雲接建康隔江多少恨付與鴈南翔

戴唐鄉挽詞

湖海長為客干戈僅脫身來尋林下友半與鬼為鄰馬
上人何在庭前草自春平生饒意氣寂寞委荆榛

竹軒雜著卷一

欽定四庫全書

竹軒集著卷二

宋林季仲撰

七言律詩

次韻希父見寄二首

晚窓落莫雪飛花點綴山翁兩鬢華好辦青銅買村酒
共撐小艇訪漁家覺非便合如陶令得趣何勞問孟嘉
只怕故人騰踏去短檠誰與話天涯

臘前牆角見梅花雪後牆頭見月華滿引濁醪無一事

盡收好處入吾家結廬君待歸安固抱甕儂今老永嘉
莫道青山便遮斷春風浩蕩沒津涯

次高季應韻

杖屨相從秋水濱便將公作社中人酒行苦要深浮白
醉去那知倒着巾把手共憐江國月回頭休憶野堂春
太平未見身先老看取吳霜點鬢新

次韻林茂南見寄

轉首今吾非故吾問君何用惜居諸流年已作悠悠夢

往事徒勞咄咄書濁酒半壺時自酌醉頭一月不曾梳
阿誰似我渾無事睡到日高三丈餘

陰陰松竹滿東山聞說君家六月寒若得封胡同里巷
底須屈宋作衙官酒中有趣人誰識琴上無絃我亦彈
試問廬江何秀德貂蟬孰似鹿皮冠

移竹次林英伯韻四首

蒼苔斷破斧痕新移傍頽簷慰病身見我渾如舊相識
此君端是箇中人孤高自比西山潔澹泊寧甘南巷貪

夢斷啼鴟窓轉月憐渠猶把影相親

不向窓前着色新老夫無處可安身寒梢已拔千尋
劍空腹堪容數百人染淚浪傳湘水恨結根終伴杜陵
貧回頭萬事皆衰歇歲晚相從爾獨親

手種琅玕照眼新老來深寄五湖身連宵留得枝間月
邀我同為物外人封殖不貪千戶富依棲可慰一生貧
武夫稱謂殊龐俗却恨樊川語未親

娟娟猶帶露痕新分得江潭未化身歲晚定知堪傲雪

生來不肯強隨人心如龐老空諸有節比原思不恨貧月
淡風清卧寒谷倡予和女復誰親

婁夫人挽詞

曾將句讀授兒童記得何候待我隆肯闢高堂舍孫寶
定知賢室贊張忠蘭陔未遂三山養霜樹俄驚一夜風
湯沐追封他日事哀榮應在淚痕中

高太傅挽詞

聲利場中意獨消端如處士翳蓬蒿渡江一馬神先助

夾日五龍功更高不願本朝私戚里長稱文母訓兒曹
十年共說無生話却對東風淚滿袍

贈劉舍人次德裕弟韻

鴈塔聯名記昔年天涯一見破衰顏人言巧宦何曾巧
我欲閒居未得閒弱植自憐葭倚樹雄文纔許管窺班
明公舊有經綸手今日寧當縮袖間

次韻林琳南秋興見寄

秋陽晃朗秋江前秋山青翠飛鳥邊待扶僂人九節杖

去采玉井千葉蓮一丘一壑不在我或用或舍其如天
故人謫官卧空谷誰與晤語情淒然

陪郡守趙介然泛舟

邦人夾岸覲龔黃畫鷁赤猶轉曲塘風定波平溪練淨
沙寒石出木奴香冥搜萬象詩肩聳流盼千山醉眼長
此興在公真不淺更乘霜月倚胡牀

趙守泛舟康侍郎有詩次韻

彈壓湖山有主人我如鴻鴈亦來賓連雲島嶼參差見

過雨林塘取次新霜橘似誇千古富雪梅欲放一枝春
酒醒月落愁無那聽徹殘更斷曉闌

周希父賦梅次韻二首

村舍江南雪意遲月邊初破兩三枝輸他一點先傳得
回首千花總後期春事循環寧有盡歲華日晚漫多悲
君詩到眼如圖畫寫出行人立馬時

歲華物意兩俱遲開到前村第幾枝抱影自憐春有信
衝寒長指雪為期音傳龍首人相憶恨入樓頭覺正悲

花瘦惱教人共瘦月明風定酒醒時

次韻康侍郎詠雪

天公昨夜醉如泥
璧碎浮雲散漫飛
謝女饒他歌柳絮
曹人堪笑比麻衣
平鋪寶貝知何限
豫表豐祥不待祈
最是松林難畫處
晚晴猶吐玉霏霏

次韻劉敷言詠梅四首

梅花笑我無佳句
慚媿詩翁亦姓林
細看窗前墮秋葉
誰知雪底得春心
斷橋斜徑光將夕
澹月疎雲趣更深

何處清香惱行客江頭跋馬試教尋

江空木落出遙岑
何處佳人獨倚林
不負雪期如有信
偶先花事本無心
日低脩渚雲容薄
路轉寒塘暝色深
莫怪山翁數回首
暗香十里更相尋

粉痕欲破雪相禁
如妬孤英點暮林
九陌未傳花底信
一枝先寄隴頭心
月橫瘦影池塘淺
風度微香院落深
挿向鬢邊猶得在
未須笑我老浸尋

霜清木脫峭寒侵
驚見佳花吐遠林
冷落自憐池上影

孤高誰賞月邊心簡文剪綵談何易

梁簡文梅詩定須
還剪綵效作兩三

枝杜老巡簷意最深寂寂溪橋斷行跡吹香獨與我追

尋

春日感懷

憶昔青春去不來深憑百舌喚將回尊前便覺和風轉
鏡裏生憎白髮催青破輕寒歸驛柳香和宿雨落江梅
人生七十從來少待挽長河作壽杯

挽程大夫詞

金章朱轂爛盈門春入仙翁笑頰溫曳杖時時過他客
含飴日日弄諸孫風高值水驚霜葉月落點山泣曉猿
丹旆悠揚轉寒日尚疑簾下綵衣翻

贈李端明

洗盡烟嵐見海山池塘春草亦怡顏野沉犬警清宵迥
簷轉堂陰白晝閒移鎮又傳三疊鼓告庭行促百官班
攀轅父老休相憶總在鑪錘橐籥間

三椽休斧陳開祖有詩次韻

經營草舍得能難甫及斜川八九間傍砌更移牆後竹
鈎簾獨盼雨餘山月投窻隙如相覓雲過簷端却復還
長憶少陵規畫遠要令寒士總歡顏

次韻酬劉延伸

僕別劉文五年矣千里之情深寄于詩次韻
奉酬殊愧不工耳

門翳蒿萊誰往還憶君更覺鬚毛斑何時共對吟邊月
相別猶憐雪後山東陽之別時值大雪僕曾留詩云北
山未忍輕相別更許行人雪後看

清夜忍聞庭鶴怨
餘年應伴海鷗閒
有人問我今何似
兀兀長如醉夢間

次韻酬趙寶學

高軒曾過我柴關
笑看莓苔滿地斑
隱約誰憐許居士
風流得倚謝東山
詩鏘金石音尤古
筆走龍蛇意自閑
後日陪公那可得
飄然身在五雲間

再次前韻酬趙寶學

佳章一見一開顏
讀向寒窓到日班
筆陣知公來似雨

詩肩笑我聳如山。皂鴈氣欲凌千里。老驥身猶絆六閑。
聞說漢庭思祭酒。詔書相繼促河間。

用前韻酬高仲貽見贈

杖藜谷口佇歸雲。生理蕭條一葛巾。未敢軒眉焚芰艸。
更期晚節伴霜筠。江山約我盟。猶在風月於人意自新。
木落寒林水清淺。小橋共看雪梅春。

再次前韻

野性由來愛水雲。強將麋鹿着冠巾。救時或用魯連子。

談古空如司馬筠邊雁驚心雙淚落吳霜點鬢二毛新
腐儒無用終羞死只合歸耕壘上春

樂壽閣

康平仲建閣名曰樂壽取仁智樂山水之意
索詩次韻

看山玩水適吾情此語從來誤後生喚起萬端因好樂
靜觀一理本圓成與人不競春長在對物無心鏡自清
更就阿誰求樂壽當時分付最分明

贈虞教授別

儒生底用苦知書
學到根源物物無
曾子當年多一唯一
頽淵終日只如愚
水流萬折心無競
月落千家境自孤
把手沙頭莫言別
與君元不隔江湖

次韻追和錢穆父內翰
魏趙伯堅大卿令鑠游
潁湖呈正字實學即伯堅子也

潁水如聞得月多
黃金萬頃漾微波
登臨未送平生目
賡唱空傳故老歌
宦意請看頭上雪
盃行且覆掌中荷

吾鄉亦有西湖好
舴艋相從意若何

次韻吳清叟書懷

誤落樊籠二十年
蒼顏白髮意頽然
解紛無用空彈鋏
揣分唯堪備執鞭
乘鴈去來何足數
涸魚濡沫自相憐
扁舟東下雖云晚
及見梅花破臘前

次韻宋待制晚春書懷

春事何曾解有窮
枝頭尋覓漫忽忽
去來燕認誰家戶
開落花因一夜風
萬古英雄殘照裏
半生勲業醉魂中

騷人往往多詩瘦却怪老夫顏色紅

次韻沈叔權書懷

忽思身世愴然驚漫學雕龍藝未成尸素空糜太倉粟
辛勤有愧老農耕只須鬢上者熟業休向人前道姓名
歲晚相從白巖下一尊芳酒話深情

再次前韻書懷

兩眼昏花近十年簡編惟見字斑斑養生正合師黃石
招隱寧須待小山薄宦本無朱組願高眠得伴白雲閒

清風却似憐孤寂時送禽聲到枕間

魏府君挽詞

霜露長悲陟岵人見翁強健却酸辛家徒四壁知無恨
掌有雙珠未是貧老去米鹽渾不問病來藥石強相親
歸從先塋平生志松下應逢月色新

次韻和康文真率之集

行步欹危老病身勝遊那敢廁苟陳試思珠履三千客
何似風雲六七人雪意遲疑終未決詩筒來往莫辭頻

曉窓新得東君訊已放梅梢一點春

次韻和康侍郎游仙巖

林巒爭入馬蹄來宿霧殘雲撥不開石卧松根橫碧玉
瀑懸天外轉晴雷仙家長鎖青春好老子猶堪竟日陪
收拾此身知有所一間茅屋傍山隈

送梁尚書移守宛陵

堂堂體貌照簪纓天與君王佐太平拭眼待看蕭相國
舉杯且屬謝宣城花間未聽歌聲徹笛裏先催別恨生

說與邦人休卧轍過家聞欲趁清明

蕭朝宗旅寓有途窮之歎次韻以廣其意

路入長安處處同斷橋絕港自相通地高何羨三公貴
境樂那知四壁空萬象森羅皆拱北百川曲折定趨東
懶從宦達如曾閔也有芳猷到不窮

表之索詩為別

踏着禪門步步新布衣蔬食欲終身解顏一笑如深契
拭眼相看尚未真世事盡歸簷上雪我生聊寄甕頭春

夜深坐對柯山月應念滄江獨釣人

次高承宣韻題劉知言郊居

荷鋤歸伴隴頭雲懶傍侯門更整巾卜築君能如沈約

題詩吾亦效王筠

約郊居筠題詩於其齋星

湖光晶晶千山谷竹色

娟娟一徑新酒後笑歌應耳熟西園驚破海棠春

諸公遊日

一枝海
棠先開

陳升仲挽詞

莫歎交情大署門交情如子復何云友恭便是能為學

樸訥由來自少文曾解綿袍憐范叔當留寶劍報徐君
雪梅時節尤相憶長話平生到夜分

迎華觀落成蘇侍郎賦詩次韻

亂山爭挾我先登拭眼還驚見未曾不為遊觀事斤築
可憐撐拄費薪蒸竹依窓牖秋鳴玉月墮樽壘夜飲冰
說與溪船莫吹笛斷腸人在最高層

早春有懷

青春無語到天涯百舌枝頭漫自誇紅破輕寒入桃萼

香和宿雨落梅花風吹杖屨千山晚水照林塘兩鬢華
萬事蕭條兵革裏北飛愁見鴈行斜

寄婺州周知錄

不到東陽六七年干戈身世兩依然每思三慮堂中退
徑向雙溪樓上眠空翠霏微浮酒筳林烟杳藹沒漁船
有人問我今何似頭禿昏昏瘴海邊

寄劉知言

年來何止二宜休合把身名付釣舟寒食又衝花下雨

晚塘漸狎棹前鷗推居誰復如公瑾種竹猶憐似子猷
子猷假人宅必種竹余假知言宅故云來坐梅陰引春酒微酸點點着枝頭

次曾穉甫韻寄賀子忱

狂客當年隱四明至今孫子愛林坰掛冠無愠亦無喜
抱膝自歌還自聽時弄清琴懷賀若何妨後乘載樵青
結鄰能踐前言否春色方深絕境亭

州將設宴諸薦士 時有十九人

化蜀文翁竟好文坐令風物一番新爭飛方朔三千牘
何止平原十九人棫樸佇觀周室富茆芹先傍魯宮春
使君勸駕無多語莫學公孫只為身

盧守攜酒過薛直老草堂次韻

畫戟森森轉水渭草堂顏色帶恩私亂離海上多簪綏
樂磚風前卸馬羈醉帽半欹花近眼賡歌間發墨翻池
諸公明日朝天去且為南陽借杜詩

寄題蔣封州三徑堂堂本在丹陽後避地四明

再創

三徑開從蔣充州至今孫子亦風流鈎簾雖對鄧山月
聞笛應悲京口秋往事漫勞書咄咄餘生只合賦休休
問君辦得蓑衣否便好相隨上釣舟

春日郊行

困倚春風半醉醒小橋流水欲相平晚蹊窈窕行桃李
野老逢迎畧姓名浦澈遠兼江色暝鳬鷗迴立夕陽明
田家作苦吾何恨無補公家合退耕

次韻趙秉之郊行

看取吳霜點鬢新利名場裏合抽身去從宦路謀多拙
歸伴田夫味最真落木正饒窓外月小梅猶斬臘前春
他時更有郊行句遠寄臘溪獨卧人余之別墅
名臘溪

次韻梁守登富覽亭

朝來爽氣自橫空躡屐寧須學謝公似此江山何處有
合分風月與人同消磨萬古潮聲裏搖兀千林酒浪中
欲和陽春無好語尊前莫笑囁嚅翁

絳人老矣休問年萬事灰心寧復然有客雅知林下趣
憐渠獨得酒中天摩空雁影沉波底照眼梅花破臘前
雪意方濃君且住行歌同掛杖頭錢

又用前韻二首

雕甍華棟照晴空更憶簷前十八公四望川流何富有
一時歌詠許誰同海吞萬壑蒼烟外地湧雙峯白浪中
洞接仙都春色早桃花認得鶴溪翁

遺跡榛蕪四十年使君跋馬獨依然要將舊觀還驅客

幻出新亭倚半天井邑參差圖障裏烟霞明滅酒尊前
我今不是貧居士買斷江山莫計錢

寄題趙丞相獨往亭詩

海內英豪還有誰寧容丘壑著臯夔欲知今日中興業
已定黃岡獨往時謝傅本無朱組願留侯應念赤松期
更須整頓乾坤了我亦芒屨隨所之

趙彥挽詞

鐵面聲名滿九州爾來孫子亦風流怡雲自比陶弘景

下澤誰如馬少游醉袖舞低千嶂月釣綸翻動五湖秋
可憐舊日飛觴處波影空搖百尺樓

侯公謹挽詞

富貴功名等弁髦何如聲迹翳蓬蒿倦游正被微官縛
辭祿方知處士高華萼向來榮父行余所居華萼坊以
君家諸伯父得名

芝蘭重見秀兒曹寄言護國山頭月莫照山猿夜夜號

林林南挽詞

新詩寄我五年前讀向寒窓倍黯然自古伊優多得志

如君疎直竟誰憐去凶何愧如行父深詆那知中咸宣
咸音遊世若為能遠過試收清淚問蒼天

薛康朝挽詞

意氣平生百不伸一麾晚出守宜春功名到此當言命
才術如公豈後人庭集鵝雛知有種拌堆首嘗未全貧
江寒木落悲無那詩寄蓬牕墨尚新

九日諸人集于資福閣次高季應韻三首

秋入江山晚更妍登高臨遠意淒然且浮綠蟻眼前樂

底用虛名身後傳
舊隱未教幽鶴怨
清溪終伴白鷗眠
老來舉措多羞澁
強挿黃花趁少年

隔竹通暉月自妍
樽前寶炬不須然
毫飛閣上千林濕
句落雲間萬井傳
佳節敢辭通夕醉
宿醒還傍小窓眠
鬢邊黃菊應相笑
白髮較多似去年

戲馬臺前草自妍
英雄何在竟茫然
江河猶帶重陽恨
父老空將舊事傳
去雁來鴻波浩蕩
夕陽流水樹半眠
休休世味從來惡
細嚼霜英慰暮年

和高少保九日

誰將淡墨掃秋山乞與衰翁獨倚欄白髮試思何處去
黃花今有幾人觀老來自覺情懷惡客裏長嗟會面難
卷盡浮雲放明月與公同倒百杯盤

次韻張子猷賦凱旋之什

十萬貔貅擁鼓鼙雲間聽得一聲齊祥開虎帳妖氛落
威疊鯨江怒浪低曉日彩旌沙外轉春風歸馬柳邊嘶
幕中自有燕公筆合把奇功勒建溪

題薛獻可新居次高仲貽韻

高居占得野塘橫竹徑桃蹊取次成宿靄半薰朱戶濕
好山常傍晚窓明風吹酒面春情渺月落詩腸夜味清
今日主人歸定否試聽枝上子規聲

送思深赴泉州錄參

南郭先生卧病餘瘦如騏駢服鹽車厭嘗添葉青黏散
旋理司空城旦書長陌欲登秋色薄一樽相對鬢毛疎
晉江波與溫江接消息頻傳雙鯉魚

五言排律

和梁守饑諸貢士

右文逢聖代首善自神京延及吳中士咸稱洛下英我
邦雖僻陋此學號專精耆舊風流在山川氣象新元侯
來作牧後進賴提衡有美僖公頌誰高蜀守名能書偕
計吏燕豆列賓榮萬里雲霄路搏風翥去程

張叔靖詠螢次韻

榛莽荒秋雨郊垌接暮陰挾明如自喜穿隙互相尋晝

伏終羞日宵
征欲亂參林
驚光不定葉
脫勢俱沉代燭
時臨卷隨風
屢拂琴青熒
行燭火的爍
漾沙金巧自緣
簾幙翻令念
藁砧徘徊憐
扇影婉孌傍
衣衿窓曙星河
落江寒霜露深
危蹤悵何往
腐質諒難任

五言絕句

不見胡仲
隸題蘇溪僧壁

念別三年久相望
一舍間無人寄消息
風雨暗前山

七言絕句

宿天台石橋

卧聽泉聲似雨聲直愁泥滑馬難行世間疑事多如許
千百年來誰與明

令人議論只從多寶土那能鄣大河我有室廬亦方廣
歸途不向石橋過

釣臺

脫身歸去亦何求剛被聲名落釣鈎買得扁舟在祠下
從公覓取舊羊裘

泊鴈蕩能仁寺

萬壑千巖簇馬蹄羞將塵鬢照清溪晚雲帶雨東風急無數飛花過竹西

墨梅

一枝炯炯照人寒絕似溪橋立馬看祇恐春風解香怨漏他消息入毫端

次韻十叔父書懷

咸陽市上欲思歸人到於今笑李斯老去何如我癡叔

了無一事獨支顧

郊行感懷

路轉溪迴草木香有人荷笠山之陽定知我是金華守
笑道牧民如牧羊

羽仗霓旌去不還空餘菊水照人寒至今山下無枯草
便是田家九轉丹

竹光野色淨祠堂古木千章儼在傍矯矯先生竟何往
癡兒猶認石為羊

一夫容易縛淮陰
辟穀留侯念已深
去伴赤松聊爾爾
後人真向海山尋

題外兄毛國器壁

尊酒相逢海一涯
娟娟沙月照人衣
重來時節君須記
流水桃花魚正肥

題廣照院壁

晚溪飛出小橋斜
流水紫迂帶落花生
怕人來問時事
杖藜聊復過僧家

罷金華留別雙青

手植雙青十八年
牆頭一見一淒然
飽嘗霜露休相憶
我欲歸耕瘴海邊

蕭德起諸人約遊西湖小疾不赴

倚杖瞿然一病夫
羨君聯騎出西湖
若逢佳處能相憶
寄與新詩作畫圖

遊智者寺

一逕榮迂上翠微
亂紅無數撲人衣
忽忽來往成何事

不似山禽自在飛

過荆山寺

叢條曾欲截來轍應訝行人數往還歸老故園猶得在

滿斟盈酒謝荆山

趙殿撰賞紅梅次韻

西湖獨未賦紅梅留待知音細細開好把新詩補遺逸
不才空與作雲來

秉燭照紅梅再次前韻即席

玉妃初醉下瑤臺紫霧深深撥不開却恐錯穿桃杏徑
高燒銀燭照歸來

猷於行役感梅賦詩

歸袖曾攀牆外子征鞍又拂雪中花往來應被江梅笑
笑我經年不在家

次韻和康侍郎雪後小雨二首

殘霽初伴梅梢月小雨仍禁柳底春莫厭酒搖金盞浪
更聽歌繞盡梁塵

白頭羞見尊前燭頰頰深憑甕裏春不分落梅紛似雪
更兼疎雨細如塵

登張知省溪樓

木落霜清橘柚香榜歌迢遞起滄浪來鴻去鶩紛無數
怕上西樓望夕陽

鴈橫霜渚水痕收簷外微雲去復留多謝西風解人意
盡驅爽氣入溪樓

登望湖樓

風塵漠漠暗中州
無力持顛漫自憂
花鳥相逢非昔日
不堪重上望湖樓

次韻苗彥先題薛獻可新居四首

仙隱深深竹徑中
杖藜還許我相從
君能惜取清陰在
斤斧須令赦孽龍

方塘環植綠楊新
朱戶重重欲閉春
若許茆茨傍清泚
敢教鵝鳴惱比隣

西山擎得落簷前
飛翠侵簾夕更妍
心遠地偏如靖節

江湖處處是斜川

軒檻青紅壓水濱
小橋斜出樹橫陳
功名豫計殊非計
且與龜魚作主人

袁居士來自桐廬索詩贈二絕句

霜鬢垂臆杖過肩
得得桐廬江上來

力之反對我休談釣

臺好姓名方挂北山移

木落空山霜露寒
却驅羸馬傍長安
君看仕路風波惡

孰與嚴陵七里灘

過東陽諸人餞別獨劉叔明不至

松竹森森瀨氣生一簾疎雨故人情扁舟還載離愁去

不見西城劉叔明

游大龍湫宿壽昌竹軒

晚驅羸馬下層丘路轉寒塘憶舊遊半夜雨聲碎庭竹
更疑飛沫濺龍湫

題護國院竹光軒

茶罷移床就竹眠冷然風起和流泉山禽未絕東歸客

時送清音到枕邊

罷官金華手植秋香而去通判賦詩勉強次韻
孤根憶向雪中移蚤被春風次第知奪汝巖柄近城郭
多應相怨不相思

重九前一日宿靈巖

馬上衰顏只自嗟驚心那復見黃花花如相問終羞澁
底甚重陽不在家

送張侍郎歸省

時時去弄老萊衣也似何蕃歲一歸相送江頭無一語
寸心遙與白雲飛

失題

平生丘壑自相於幽意悠然入畫圖好向溪邊石礫上
羊裘披我作狂奴

題康待所所居二首

閒居正怕門庭雜學道仍嫌歧路多仲蔚當時開一逕
問渠初意果如何一徑堂

莫道水清偏得月須知水濁亦全天請看風定波平後
一顆靈珠依舊圓

止鑑

富季申賦梅次韻四首

容易煩公問訊梅昨宵還有幾花開牕寒月落知相憶
細細吹香過竹來

雪意商量欲放梅破寒先遣一條開去年花下人何在
策我蹇驢歸去來

誰將消息報江梅一點先從雪裏開怪見逢迎有深意

我家曾與寫真來

未知何處是真梅
雪擁溪橋撥不開
莫訝行人數回首
西風十里送香來

訪梅值雪示覺慈昇老

林巒出沒晚雲低
旋放寒梅照淺溪
雪意殷勤解留客
不教歸馬識東西

和康侍郎喜雪二首

六出隨軒逞厥祥
天人應感得能忙
使君未到然香處

先有心香叩上蒼

不掃林間一逕開夜深留伴月皎皎問誰踏我瓊瑤碎
新有詩筒破曉來

宿中竺碧梧軒

夢破初驚枕簟秋懶思身世獨搔頭山禽強欲知人事
葉底移詩語未休

宿錢塘江詩

大江推月上層霄夜色分人此最饒鄉國未成千里夢

海門又捲五更潮



竹軒雜著卷二

欽定四庫全書

集部

竹軒雜著卷三

四三

詳校官編修臣范來宗

主事臣呂雲棟覆勘

謄錄監生臣吳殿英

欽定四庫全書

竹軒雜著卷三

宋 林季仲 撰

疏

謝雨疏

比愆膏澤嘗控微誠條興觸石之雲旋致隨車之雨銷
旱魃於方虐起嘉穟於將萎農知有秋吏遂塞責何以
酬於厚施願不在於多儀惟既乃心其斯為報

表

知婺州謝上表

起於罪籍付以名城祇服恩華惟深感涕中謝伏念臣孤愚
自信樸直無他但求分義之安不計宦游之拙誤蒙識拔頻
玷使令旋蹈禍機橫遭口語方杜門而省咎遽分竹以承流
矧惟是邦素號無事昔陪掾屬備悉土風道不遠於之官情
獲伸於將母誰云庸廢更被寵私此蓋伏遇皇帝陛下天覆
推仁日新圖治以臣嘗為縣道粗究民情謂臣數對便朝具
知德意遂承人乏不以望輕臣敢不深體淵衷仰遵明訓恪

勤奉法妾希循吏之良平易近民痛戒庸人之擾臣無任

關

劄子

論軍費劄子

竊以天下之勢猶一身病在四支不足憂病在心腹為可畏天變見於上坤載震於下水旱不時強敵內侮此四支之病也爵賞及於無功府藏困於冗食賦斂仍數人民怨咨此心腹之病也邇者國運中否金人渝盟二聖六宮遠征沙漠兩河之地淪於兵革生靈瘡痏迄今

未瘳斯病也亦云劇矣然而陛下入承大統海內之民悲喜若更生無懷二心以他適者繇祖宗以來除煩解澆輕徭薄賦涵養垂二百年深仁厚澤有以結其心爾臣以是知天下之病在四支不在心腹也然國以民為本民以財為命取之過多予者亦怨官曰和買貲者初不和也民曰樂輸輸者初不樂也錙銖之求不能給億萬之費涓滴之積不能實尾閭之泄日削月朘寢以大窮禍有不可知者或曰兵貴精不貴多太祖削平僭偽

不過十萬所得蜀兵擇其精者止留一百二十人餘悉遣之則嶺南諸國之兵所留者可知矣今列戍相望冗食尚衆盍亦擇勇銳而汰老弱給以閒田使耕鑿於其中可乎或又曰惟器與名不可以假人曹彬平江南太祖不與使相但賜錢數十萬其他隨以平難者皆厚賞之終惜名器不肯輕予今邊陲有警全軍轉官有功者侮無功者急非所以示懲勸也盍亦告戒諸帥覆實奏功斬獲顯著方許第賞至於給厯乃朝廷之異恩宜留

以待立竒於淮北者其餘碌碌從軍止以金帛犒之可乎不然軍費日滋民力愈屈今年月支一百萬明年月支二百萬又明年月支三百萬地未恢復即前日之地也民未蕃庶即前日之民也坐以自困事窮變生臣恐天下之病不在四支而在心腹矣惟陛下蚤圖之幸甚取進止

狀

乞遴選諸將賓佐狀

臣嘗讀韓愈文見其論述孔戡之賢竊有感於心者試
為陛下言其始末戡為昭義節度盧從史幕官從史為
不法戡必爭之從史羞愧立為更改者前後數十事平
居與從史說古今君臣父子之道順則受福逆則危辱
誅死且曰公當為彼不得為此從史嘗聳聽喘汗唯唯
從之戡後有所不合棄之而去從史專恣遂至於敗夫
以幕官之賢否繫將帥之成敗則選用賓佐可不慎哉
今三四大帥統重兵於外能懷忠赤共濟艱難固無從

史之事矣獨未知賓佐皆如戡賢否也近時文士鄙薄
武人過甚指其僚屬無賢不肖謂之從軍雖有賢如戡
者往往未必屑就文武一道也何至如是之區別哉臣
愚欲望陛下遴選老成練達之士往助諸將稍優禮秩
以寵其行遲以歲月不見闕遺擢居清要以示激勸使
之身在幕府心係朝廷出有裨贊之益入有榮進之望
上可以鞏固王室下可以保全功臣非小補也惟陛下
留神幸甚取進止

乞戒敕諸將狀

臣聞合則強離則弱天下之勢皆然昔吐谷渾阿豺有
子十九人一日令各奉一箭來命母弟慕利延曰汝取
一箭折之慕利延折之又令取十九箭折之慕利延不
能折阿豺曰汝曹知否單者易折衆則難摧戮力一心
然後社稷可固夫阿豺之言固不足法用之以聯軍旅
似有可采者竊見國家帶甲之士屯戍江淮無慮數十
萬項歲敵馬憑陵士卒駭散乃使強敵得以肆其搏噬

顧芻粟非不多也兵革非不堅利也城池非不高且深
也委而去之莫有固吾圉者誠以此數大帥各自為謀
勝則爭功敗不相救其勢離而弱爾一自陛下爰整六
飛親征江上指麾諸帥如臂使指將士賈勇以爭前驕
敵望風而引郤則軍聲之壯怯國勢之強弱民情之安
危今日自可見矣臣愚欲望陛下因茲巡幸之際戒敕
諸帥戮力一心以固社稷凡應援可及坐視不救者軍
有常法必罰無赦庶幾勢合力并如十九箭之難折而

士氣益張國威愈振恢復之期可指日以俟矣取進止

乞進退大臣以禮狀

臣聞風俗治亂之所係也士大夫風俗之所自出也禍亂未平不足憂風俗未革深可畏比年以來大臣去位凡其所行之事所引之人率皆廢而逐之輩出輩入相傾相擠彼亦一是非此亦一是非至於今未決也遂使陛下願治之心憤憤然無所底定而在位之臣亦或畏首畏尾不敢展四體以從事蓋懼後患之必至也嗚呼

士大夫如此亦已甚矣今日何日而忍為是哉臣願陛下體貌大臣進退以禮唯當疇咨於未用之前誠得其人則委以庶政責以成功使夫讒間之口不得以入焉必不得已而罷黜之姑示涵容勿露彈章於天下如漢故事策免三公但以陰陽失度盜賊未弭為言雖不斥言其罪人亦自知之矣孰與淫言醜語狼籍白簡內見侮於中國外取笑於敵人使之輕其臣以及其君乎至於所行之事不必槩廢問其當否可也所引之人不必

槩逐問其賢否可也如此則皇極建私黨銷而風俗可
革矣取進止

論守令狀

監司互見

臣聞事有切於治道不可一日非其人而前後沿襲視
以為常者監司守令是已監司外臺之耳目郡守一方
之師帥委任之意顧不重哉今之補外者率懷不滿以
從事視官府如傳舍然席未暇暖則請官辭去矣况一
人之闕伺者三四在職者知更徙之不常待次者幸交

代之速去苟且如此欲其究心於民事可乎至於縣令位輕責重尤為卑陬可憐者監司郡守吾之父兄也目指氣使固所甘心下至屬官憑藉侵辱無所不至雖一卒臨門亦得而玩侮之以故稍自好者耻就此職往往罷癃而暗懦殘虐而貪暴者乃始屑而為之嗚呼令非其人一邑受其弊積諸路而言之其弊有不可勝言者將何利於國家而輕是選耶陛下憂憫黎元思得良吏以共理天下比降明詔銓量監司郡守以示黜陟雖資

考慮得才非所長者厚以祠祿終不輕畀之其於縣令尤所遴選且令館職以上各舉所知所以惠顧斯民者可謂至矣然薦章之上今既數月孰當孰否缺然未聞豈所薦者皆不得其實歟抑將有以處之而臣未之知也人固不可易知言固不可盡信盍亦參酌衆言斷以聖意曰某人某人可為監司用某人之薦也某人某人可為守令用某人之薦也少須歲月以觀能否治狀尤著者受進賢之賞廉聲不聞者被繆舉之罰周官曰舉

能其官惟爾之能稱匪其人惟爾不任不任之罰其得而辭乎近世薦舉率親故之私迫權貴之請鮮有出於公者至其曠敗事在有司乃始以狀首免曰今聞某人改節云爾蓋由犯賊同罪其罰太重遂使令典久為虛文且如近日池州貴池縣丞黃大中枉法受賄流配海外若使舉者同罪事亦難行議者欲止於降官或薄罰以愧耻之期在必行不許首免人亦孰肯輕於舉人自貽他日之羞乎况今歲亢旱所及者廣穀未登場民已

告飢撫字凋廢尤在得人臣材力縵薄不敢為其上者
願從陛下丐一縣令往以自効倘能宣布德意少裨聖
治他日備陛下使令復未晚爾臣承乏郎曹求為縣令
若不情者然官職輕重惟陛下如何以省部為重則重
在郎官以斯民為重則重在縣令夫亦何常之有漢館
陶公主為子求郎明帝不許曰郎官出宰百里苟非其
人民受其殃蓋非以郎官為重重其出宰百里也古人
有言曰請自隗始郎官出宰百里請自臣始取進止

乞察羣臣奏對狀

臣聞臣之事君猶子之事父也子之事父情誼而無嫌
臣之事君亦直言而無隱蓋天叙有典君臣父子皆天
也內之事父外之事君其道一而已矣以唐虞三代之
盛當時臣子若無可言者而賡歌之章告戒之辭惴惴
然惟恐政治之不克終如曰無若丹朱傲又曰無若殷
王受之迷亂酗於酒德哉舜聖人也成王亦賢君也何
至於是以其平居相戒如家人之禮雖或過甚不以為

姪耳陛下勵精圖治自朝至於日中是訪問羣臣亹亹
不倦凡此國疵時病吏蠹民艱二三執政暨臺諫之臣
當自悉言之矣又令百官以次面對從容而咨問之尚
慮四方之遠不及聞知乃延見監司郡守薦聽而廣納
焉下至州縣一命之微草萊一介之賤賜對於庭殆無
虛日是宜明目張膽輸忠竭誠盡言於不諱之朝也議
者謂崇飾虛言指摘細故姑為文具者尚多有之至或
專事導諛曲相怡悅冀得所欲則私計畢矣還視朝廷

無一分顧惜心嗚呼陛下負羣臣乎羣臣負陛下乎臣愚欲望陛下因羣臣奏對之際察其似此者而罷黜之但使直聲日聞乃治世之事也天下幸甚取進止

論用人狀

臣聞人各有能有不能授之以其所能則職修而事舉強之以其所不能則職廢而事隳猶耳目之官各有所司使耳司眎而目司聽其誰不謂不可哉唐虞之時禹平水土稷播百穀契作司徒臯陶作士久於其職咸成

厥功未聞前日共工而今日作虞今日納言而明日典禮樂也今中外之臣不知皆賢於九官乎抑才智與之等也賢於九官臣固不得而知矣若才智與之等亦隨其能而器使之可也況復有不及者乎古今人材不相遠必曰身兼數器無施不可者令多有之非誣則欺也自臣觀之不過厯職任養資考以為仕進之階而已階以仕進為臣子計則得矣國家何望焉都城失守敵人得軍器監丞者使之繕兵器辭以不能詰之曰爾不能

而居此官何也答曰朝廷用人以此為假塗而已敵人笑而遣之噫名存實廢獎亂隨之卒為敵人所笑良可痛哉臣愚欲望陛下為官擇人毋為人擇官其人能此事也則令居此官其官振此職也則令久此任蓋位天位也職天職也上之人量能而授之不為恩惠之私下之人度才而受之不起覬覦之望內而朝廷外而郡縣各揚厥職不懷苟且以從事然後天下之務無不舉矣漢宣帝功光祖宗業垂後嗣獨為中興之主者亦曰信

賞必罰綜核名實使政事文學法理之士咸精其能而已惟陛下圖之取進止

論役法狀

臣聞民以君為心君以民為體體之癢疴心必知之民之疾苦君必知之陛下宵衣旰食勤恤民隱凡茲疾苦宜無不知者矣而臣閒居日久出入田里知之尤詳試為陛下言之夫役法以十小保為一大保而保有長以十大保為一都保而都有正二者必以物力之高人丁

之多者為之也然法久而弊人偽日滋富而與貧為伍預知差役之必至也乃賂鄉佐求於富者為伍焉於是富與富為伍物力雖鉅萬而幸免貧與貧為伍物力雖數千而必差蓋由猾胥造獎於排甲之初致使下戶受獎於被差之後征求之頻追呼之擾以身則鞭箠而無全膚以家則破蕩而無餘產思所以脫此者而不可得時則有老母在堂抑令出嫁者兄弟服闋不敢同居者指已生之子為他人之子者寄本戶之產為他戶之產

者或盡室逃移或全戶典賣或強逼子弟出為僧道或
毀傷肢體規為廢疾習俗至此何止可為慟哭而已哉
臣伏覩紹興二年閏四月十日及四年正月二十四日
臣僚上言欲不拘甲分總以一鄉物力次第選差非第
一等不得為都正非第二等不得為保長其單丁而力
應充者許其募人官司不得輒追正身臣詳其說實為
利便欲乞檢會參酌而行之庶幾可以厚風俗息爭訟
安流移恤貧匱不煩戒敕州縣而弊源自塞矣伏望陞

下持睿斷施行天下幸甚取進止

論薦對狀

臣聞臣之事君非以為身君之用人凡以為民陛下搜羅俊彥遠逮巖穴賜對便殿問天下疾苦至於日是不遑暇食憂勤如此蓋為民也豈固糜以好爵徒寵其身而已哉然比年以來召對之人例皆遷轉而去其薦之者與夫被薦者亦幾幸如是足矣雖除授差遣在數年之後所不較也獨不知其人才邪不才邪其人果才朝

至而夕用之猶以為晚其人果不才報罷可也若憐其遠赴槩以容之賢愚能否混為一區則僥倖啟心請謁成俗徒使紛紛之論以薦對為仕途捷徑爾比挂於白簡追寢前命其傷朝廷事體不已多乎況人君不能盡知天下之才必以問執政執政不能盡知天下之才必以問士大夫士大夫為國薦士要無愧於心可也若假公舉而伸私情人以為賢則引恩於已議所不容則歸過於朝廷恐非所以仰稱陛下側席求賢之意孰

若坐所薦之人載所薦之辭得人有賞繆舉有罰曉然使天下知之而不受其蒙蔽夫人固不易知知人亦未易誠知其才無論擢用之速誠知其不才何恤報罷之嫌乃若才否未分難於億度姑試以職事遲以歲月它日褒陞未晚也書曰敷奏以言明試以功車服以庸其錫以車服固在試功之後也記曰論辨然後使之任事然後爵之位定然後祿之其予以爵祿固在任事之後也奚必一見之項一詰之間遂欲盡知天下之士乎然

巧令鮮仁木訥近仁鯁直忤意者不皆徼譽以沽名軟
美偷惰者未必恤民而憂國願因聽納之際更加察焉
凡茲臣庶諒皆不逃淵鑒而臣猶區區言之亦云贅矣
惟陛下赦其狂瞽幸甚取進止

策問

科舉

問科舉之設尚矣自昔懷材抱藝之士由此塗出卓然
為名臣者代不乏人然嚴程式謹聲律糊名易字以授

有司第取紙上語惆不知為何人涉於親故則移試他所自唐以來又謂之別頭嗚呼別嫌防微其法亦密矣假有人魯如曾參終日不違如顏子平居朴讷言不能出諸口其能操觚和墨角藝於寸晷之下乎吾知其不能也假有人樂耕釣隱版築爵祿之心銷於夢卜之初不屑屑然以聘幣為也其能擔簋負笈不遠千里而來乎吾知其不能也夫求賢佐理固欲得若人而用之莫我肯來亦病矣嚮者國家嘗念遺逸之士幽棲遐蹈遂

往山林而不返與夫孝友信義之人浮沈閭里嬾從宦
達亦既下詔擢而致之矣榮利啟心請託成俗往往貪
競之流多與計偕還而思之又不若科舉之為公也議
者欲令縣令察廉薦於刺史刺史考驗升於禮部庶幾
三代德行之舉或曰衣冠南渡僑寓者多宜廣學校以
收遺材保桑梓者鄉里舉焉在流寓者庠序推焉或曰
科舉行之已久士子循習難於速變紛紛之說將誰從
而可乎此事也當與諸君議之

守禦

問吳恃蜀以為固蜀依秦以為疆輔車之勢也國家承平日久武備不修慨彼秦闕淪於邊境強敵之心難以信結肆其威虐復擾坤維今日之慮莫先於是矣試思彼之闖闢詭計安出我之經理要術奚先將乘銳以深入邪則僥倖一戰事危而變生將保險以固守邪則轉輸千里師老而財費將分兵以屯田邪驕惰之久操耰者必怨將募兵以助耕邪死亡之餘復業者全寡况湖

湘之盜逾年未禽尚假游覓出沒叢薄將緩是誅邪或謂虛內事外腹心之患不可留將靖是難邪或謂舍大圖細事幾之會不可失然則攻取之方守禦之策若緩若急孰後孰先必有能明是者幸悉言之天子方遣元帥以圖恢復斯有取焉爾

道學

問道不因有經而存亦不因無經而亡其出於人心者常在也仲尼默識何假語言顏氏心齊不立文字學者

仰之以為宗師至於曾子易簣不亂於死生季路結纓不屈於威武咸用此學見於所行厥後揚雄韓愈最為尊吾道者雄之言曰遜於不虞以保天命其意欲遠害也然美新之書亦得已而已矣愈以市道望於權貴屑屑然從求芻米僕貸之資識者恨之由前之學如彼由後之學如此其故何哉然則回稱好學所好者何學軒不得其傳所傳者何事聞一知十與夫隸事之學同乎否也博學於文與夫纘言之文同乎否也諸君朝

夕所論將不在於斯乎願與聞之

竹軒雜著卷三